

Ku dhaqan Xafiis D.

FAAFINTA

الرسمية

OFFICIAL



RASMIGA AH

الجريدة

BULLETIN

EE JAMHUURIYADDA SOOMAALIYA

Sanadka 13aad

Muqdisho, 01 August 2026

Lr.3

Waaxda Maamulka Faafinta Rasmiga ah
Ee Xafiiska Garyaqaanka Guud ee Dawladda

FAAFIN BIL SOO BAXA

Qiimaha waa \$XXX Dollar, lambar waliba – **RUKUNKA:** Sanaddii waa \$XXX Dollar, Soomaaliya gudaheeda – Dibaddeedana waa \$XXX Dollar. Rukunka la weydiisto waqtiga loo gooyay wuxuu ka bilaabmaa 1 Janaayo. Qiimaha Qoritaanku F.R halkii sadar iyo wixii ka yar waa \$XXX Dollar – Rukunka iyo Qoritaanku waxaa la weydiistaa Laanta Maamulka Faafinta Rasmiga ah – Lacagta waxaa lagu bixiniyaa Xafiiska Canshuuraha ee Wasaaradda Maaliyadda.

KOBNIIN

BOGGA KOOWAAD

SHARCI

W.M

BOGGA LABAAD

XEER

BOGGA SEDDEXAAD

TALOOYIN, ISGAARSIIN, OGAYSIIS, IWM

BILAHA

March-July

2026



The Federal Republic of Somalia
Office of the Prime Minister

Xeer Ra'iisul Wasaare Lr.198

Taariikh:07/03/2026

**XEERKA: XEER-NIDAAMIYAHA DHISMAHA HAY'ADDA DARYEELKA
AGOONTA SHUHADDADA, NAAFADA & HOWLGABKA
CIIDANKA XDS**



Ra'iisul Wasaaraha Xukuumadda JFS;

Markuu arkay:

Qodobka 97^{aad} farqadaha 1^{aad} iyo 2aad; iyo Qodobka 99^{aad} farqadaha (a), (b), (e), (f) iyo (i); iyo Qodobka 100^{aad} farqadaha (a) iyo (d) ee Dastuurka KMG.

Markuu arkay:

Qodobka 1^{aad} Ee Sharciga Dhismaha Hay'adda Daryeelka Naafada & Howlgabka Ciidamada Qalabka Sida (Sharci Lr. 38/1984).

Markuu arkay:

Warqadda summaddeedu tahay WG/XW/049/02/26 ee ku taariikheysan 21/02/2026 ee Wasaaradda Gaashaandhigga kuna saabsan codsiga soojeedinta Xeer-nidaamiyaha Dhismaha Hay'adda Daryeelka Agoonta Shuhaddada ,Naafada iyo Howlgabka Ciidanka XDS ;

Markuu arkay:

Go'aanka Shirka Golaha Wasiirrada ee summaddiisu tahay SHGW.07.147.3.26 ee 05/3/2026, kuna saabsan Ansixinta "Xeer-nidaamiyaha Dhismaha Hay'adda Daryeelka Agoonta Shuhaddada ,Naafada iyo Howlgabka Ciidanka XDS " oo uu Goluhu cod buuxa ku ansixiyay;

Markuu tixgeliyay:

Muhiimadda Xeer-nidaamiyahan u leeyahay Dareyeelka Agoonta iyo Qoysaska Xubnaha Ciidanka XDS.

Wuxuu Meelmariyay

Qodobka 1^{aad}

Go'aan Gole

Go'aanka Shirka Golaha Wasiirrada ee summaddiisu tahay **SHGW.07.147.3.26** ee **05/3/2026**, kuna saabsan ansixinta **Xeer-nidaamiyaha Dhismaha Hay'adda Daryeelka Agoonta Shuhaddada ,Naafada iyo Howlgabka Ciidanka XDS** oo uu Goluhu cod buuxa ku ansixiyay.

Qodobka 2^{aad}


Hirgalin

Waxaa Wasaaradda Gaashaandhigga loo igmaday in ay hirgaliso meelmarisana Xeer-nidaamiyahan.


Qodobka 3^{aad}

Dhaqangal

Xeer-nidaamiyahan waxaa uu dhaqangalayaa marka uu saxiixo Ra'iisul Wasaaraha Xukuumadda Jamhuuriyadda Federaalka Soomaaliya, waxaana lagu soo saarayaa faafinta Rasmiga ah ee Dowladda.



Mudane, **Hamza Cabdi Barre**
Ra'iisul Wasaaraha Xukuumadda JFS.





THE FEDERAL REPUBLIC OF SOMALIA
OFFICE OF STATE ATTORNEY GENERAL

Sumad: XGG/080/2026

21/02/2026

Ku: Agaasimaha Golaha Wasiiradda XFS
Ku: Wasaaradda Gaashaandhigga
Og: Xafiiska Ra'iisul-wasaaraha

Muqdisho
Muqdisho
Muqdisho

Ujeeddo: Talo bixin sharci

Xafiiska Garyagaanka Guud ee Dawladda oo tixraacaya Warqadda Summaddeedu tahay **WCAD/XAWSHH/2955/2026**, ee ku taarikheysan **15/02/2026**, kana soo baxday Wasaaradda Caddaaladda iyo ArrimahaDastuurka XFS, Ujeeddadiisuna aheyd **Soo gudbin "Xeer-nidaamiyaha Hay'adda Daryeelka Agoonta Shuhaddada, Naafada iyo Hawl-gabka Ciidanka Xoogga Dalka Soomaaliyeed"**.

Xafiiska Garyaqaanka Guud ee Dawladda oo gudanaya waajibaadka lagu tilmaamay Sharci L.r.18 ee 29 Janaayo 1976, waxa uu halkaan idin kuugu soo gudbinayaa Xeer-nidaamiyaha Ujeeddada sare ku xusan, kaas oo ay Wasaaradda Caddaaladda iyo ArrimahaDastuurka XFS ugu usoo gudbisay Xafiiska Garyaqaanka, si uu uga guto Waajibaadkiisa Shaqo, uguna bixiyo Talo Sharci.

Haddaba, Xafiiska Garyaqaanka Guud ee Dawladda, kadib markii uu si qoto dheer u dersay nuxurka Xeer-nidaamiyaha, kuna sameeyay toosin aan looga maarmin, waxaa usoo baxday in uu muhiimad gaar ah u leeyahay Dhisidda Hay'ad qaabilsan Xuquuqda iyo Daryeelka Agoonta Shuhaddada, Naafada iyo Hawl-gabka Ciidanka Xoogga Dalka.

Sidaas darteed, waxa uuna Xafiisku ku talinayaa in loo gudbiyo Golaha Wasiirada, maadaama uusan kahor-imaaneyn Dastuurka, Shuruucda Dalka iyo Danta Guud, kana gutay Xafiiska waajibaadkiisa Shaqo ee kaga aadanaa, si Waafaqsan Sharciga.

F.G: halkaan waxaa ku lifaaqan Xeer-nidaamiyaha sare ku xusan

Avv. Xuseen Xasan C/llaahi

Ku-xigeenka Garyaqaanka Guud ee Dawladda



AFIISKA GARYAQAANKA GUUD EE DAWLADDA

Address: State House, Villa Somalia

Tel, +252 (0)613242015 | E-Mail: sag@sag.gov.so, archive@sag.gov.so



Federal Republic of Somalia
Ministry of Justice and Constitutional Affairs
Office of Director Legislations and Agreements Department

SUMMAD: WCAD/XAWSHH/2955/2026

Tr. 15/02/2026

Mudane Garyaqaan;

UJEEDDO: SOO-GUDBIN "XEER-NIDAAMIYAHA HAY'ADDA DARYEELKA AGOONTA SHUHADDADA, NAAFADA IYO HAWL-GABKA CIIDANKA XOOGGA DALKA SOOMAALIYEED"

Wasaaradda Cadaaladda iyo Arrimaha Dastuurka, waxa ay halkan ku soo gudbinaysaa xeer-nidaamiyaha sare ku xusan oo abuuraya hannaan sharci iyo mid maamul oo lagu daryeelayo agoonta shuhaddada, naafada iyo hawl-gabka ciidanka xoogga dalka Soomaaliyeed.

Xeer-nidaamiyahan oo ay diyaarisay Wasaaradda Gaashaandhigga, waxa ay Wasaaradda Cadaaladda iyo Arrimaha Dastuurku ka gudanay waajibaadkeeda sharci ee ku aaddan xeer-nidaamiyayaasha.

Haddaba, waxaan Xafiiska Garyaqaanka Guud ee Dawladda ka codsanaynaa in uu ka guto waajibkiisa sharci ee ku aaddan xeer-nidaamiyayaasha si habraaca ansixintu u dhammeystirmo.

Wada-shaqeyn wacan.

Mudane Xasan Axmed Cali
**Agaasimaha Waaxda Sharciyada iyo Heshiisyada,
Wasaaradda Cadaaladda iyo Arrimaha Dastuurka**

Garyaqaanka Guud ee Dawladda
Og: Agaasimaha Guud ee Cadaaladda ee Wasaaradda Cadaaladda iyo Arr. Dastuurka
Og: Xoghayaha Joogtada ah ee Wasaaradda Cadaaladda iyo Arr. Dastuurka
Og: Wasiir Ku-xigeenka Wasaaradda Cadaaladda iyo Arr. Dastuurka
Og: Wasiiru-dawlaha Wasaaradda Cadaaladda iyo Arr. Dastuurka
Og: Wasiirka Wasaaradda Cadaaladda iyo Arr. Dastuurka

=Muqdisho=
=Muqdisho=
=Muqdisho=
=Muqdisho=
=Muqdisho=
=Muqdisho=
=Muqdisho=

Dr. Duseen
16/02/2026
8





**Federal Republic of Somalia
Ministry of Defence
Office of the Minister**

TIX:WG/XW/0430/12/25

Tr: 16/12/2025

**Ku: Xafiiska Garyaqaanka Guud
Og: Xafiiska Ra'iisul Wasaaraha XFS**

**= Muqdisho=
= Muqdisho=**

**Ujeeddo: Soo Gudbin Xeer Nidaamiyaha Dhismaha Hay'adda Daryeelka Agoonta
Shuhaddada, Naafada, iyo Hawlgabka Ciidanka XDS**

Si waafaqsan Qod. 102(1) ee Dastuurka JFS oo lala akhrinayo Qodobbada 3aad iyo 13aad Sharciga Nidaamka Xukuumadda L. 3 ee soo baxay 3dii Juun 1962 iyo wax ka baddelladii lagu kaabay, waxaan halkaan si qadarin leh kuugu soo gudbinayaa Xeer-Nidaamiyaha Dhismaha Hay'adda Daryeelka Agoonta Shuhaddada, Naafada, iyo Howlgabka Ciidanka Xooga Dalka Soomaaliyeed.

Xeer-nidaamiyahani ayaa ah mid muhiim u ah dhaqangelinta shuruucda nidaaminaysa daryeelka agoonta iyo qoysaska xubnaha Ciidanka Xoogga Dalka Soomaaliya ee ku geeriyooday iyagoo gudanaya waajibka difaaca qaranka ee Ciidanka Xoogga Dalku u xilsaaran yahay gaar ahaan Sharci L.38 ee soo baxay 26 Sebtembar 1984.

Sidaa daraaddeed, waxaan idinka codsanayaa in aad ka gutaan waajibaadka dastuuriga ah.

Wada Shaqeyn Wacan


Danjire Axmed Macallin Fiqi
Wasiirka Wasaaradda Gaashaandhigga XJFS





JAMHUURIYADDA FEDERAALKA SOOMAALIYA WASAARADDA GAASHAANDHIGGA

**XEER-NIDAAMIYAHA HAY'ADDA DARYEELKA AGOONTA
SHUHADDADA, NAAFADA IYO HAWLGABKA CIIDANKA XOOGGA
DALKA SOOMAALIYEED**

Febraayo 2026

TUSMO

CUTUBKA KOWAAD: QODOBBO GUUD	6
Qodobka 1 ^{aad} : Magaca Xeerka	6
Qodobka 2aad: Sharciyada Hay'ada	6
Qodobka 3aad: Qaybaha Hay'adda:	6
Qodobka 4aad: Xarunta Hay'adda	6
Qodobka 5aad: Eraybixin	6
Qodobka 6 ^{aad} : Ujeeddooyinka Xeerka	8
CUTUBKA LABAAD: HOWLGALINTA HAY'ADA	8
Qodobka 7 ^{aad} : Waajibaadka iyo Mas'uuliyadaha Hay'adda	8
Qodobka 8 ^{aad} : Dhismaha Golaha Maamulka Sare (Board of Directors) ee Hay'adda	9
Qodobka 9 ^{aad} : Xubnaha Golaha Maamulka Sare ee Hay'adda	9
Qodobka 10 ^{aad} : Waajibaadka iyo Mas'uuliyadaha Golaha Maamulka Sare ee Hay'adda	10
Qodobka 11 ^{aad} : Kulamada Golaha Maamulka Sare ee Hay'adda	10
CUTUBKA SADDEXAAD: MAAMULKA FULINTA HAY'ADDA	11
Qodobka 12 ^{aad} : Qaab-dhismeedka Hay'adda	11
Qodobka 13 ^{aad} : Kaalinta Wasiirka	11
Qodobka 14 ^{aad} : Hawlaha Maamulka Fulinta Hay'adda	11
Qodobka 15 ^{aad} : Magacaabista Maareeyaha Hay'adda	11
Qodobka 16 ^{aad} : Xilka iyo Mas'uuliyadaha Maareeyaha Hay'adda	12
Qodobka 17 ^{aad} : Maareeye Ku-xigeen Guud	13
CUTUBKA AFARAAD: MAAMULKA MAALIYADDA	13
Qodobka 18 ^{aad} : Maaliyadda iyo Xisaabaadka	13
Qodobka 19aad: Shaqaalaha iyo Howlwadeennada Hay'adda	13
CUTUBKA SHANAAD: QODOBBO GUNAANAD AH	14
Qodobka 20aad: Wax-ka-beddelka iyo Baabi'inta	14
Qodobka 21 ^{aad} : Soo saarista xeer-hoosaadyo	14
Qodobka 22 ^{aad} : Dhaqangal	14

CUTUBKA KOWAAD: QODOBBO GUUD

Qodobka 1^{aad}: Magaca Xeerka

Xeer nidaamiyahan waxaa loogu yeerayaa “Xeer-nidaamiyaha Hay’adda Daryeelka Agoonta Shuhadada, Naafada iyo Hawlgabka Ciidanka Xoogga Dalka”.

Qodobka 2aad: Sharciyada Hay’ada

Si waafaqsam Qoqobka 1aad ee shar. Lr. 38, taariikh 24 Seb. 1984, kaas oo lagu dhisay Hay’adda Daryeelka Agoonta Shuhadada, qoysaskooda, Naafada Ciidanka Qalabka Sida (CQS), kaasoo dastuurku u aqoonsanyahay ciidanka Xooga dalka Soomaaliyeed, iyo Kuwa Rayidka mutadhwiciinta ah ee ka garab dagaalama ciidanka xooga dalka.

Qodobka 3aad: Qaybaha Hay’adda:

Hay’addu waxa ay ka kooban tahay Mashruucyo kala duwan oo mid walba Maareeyntiisa iyo Maamul kiisaba u gaar yihiin, isla markaasna si toos ah ugu xiran Guddiga Sare ee Hay’adda.

Qodobka 4aad: Xarunta Hay’adda

Xarunta Hay’addu waa Muqdisho, hase yeeshee, haddii loo baahdo, waxay laamo ka furan kartaa Gobollada iyo Degmooyinka Dalka oo katirsan Maamul Goboleedyada hoosyimaada Dawlada Federaalka Soomaaliya.

Qodobka 5aad: Eraybixin

Haddii aan si kale loogu qeexin xeer nidaamiyahan gudihiisa, erayada hoos ku xusan mid kasta wuxuu yeelanayaa macnaha ku hor qoran:

- | | |
|---------------------|--|
| 1. JFS | waxaa loola jeedaa Jamhuuriyadda Federaalka Soomaaliya. |
| 2. Xubnaha Ciidanka | waxaa loola jeedaa Ciidanka Difaaca Soomaaliyeed. |
| 3. Daryeel | waxaa loola jeedaa bixinta adeegyada raashinka, dharka, hoyga, caafimaadka iyo waxbarashada. |

4. **Difaac** waxaa loola jeedaa ilaalinta iyo ka-difaacidda cid kasta oo ku xad-gudubta madaxbannaanida, gobonnimada, midnimada dhuleed ee Jamhuuriyadda Federaalka Soomaaliyeed iyo Difaaca Qaranka.
5. **CXD** waxaa loola jeedaa Ciidanka Xoogga Dalka.
6. **Guddoomiye** waxaa loola jeedaa Madaxweynaha Jamhuuriyadda Federaalka Soomaaliyeed.
7. **Gunno** waxaa loola jeedaa xuquuqda (Pension) la siiyo xubinta Hawlgabka ah ama qoyskiisa si waafaqasan shuruucda dalka.
8. **Maareeye** waxaa loola jeedaa mas'uulka ugu sarreeya qeybta fulinta Hay'adda.
9. **Naafada** waxaa loola jeedaa Xubnaha ka tirsan Ciidammada Xooga Dalka, darajo kasta ha lahaadeene, ee ku dhaawac- may goob dagaal ama iyagoo gudanaya waajib. qaramaad, dhaawacaas oo u keenay naafo jireed ama maskaxeed oo buuxda ama dhiman (invalid' totale o parziale).
10. **Shuhadada** waxaa loola jeedaa halyeyada Ciidanka Difaaca Soomaaliyeed ee naftooda u huray difaaca dalka.
11. **Wasiirka** waxaa loola jeedaa Wasiirka Gaashaandhigga Xukuumadda JFS.
12. **Wasaaradda** waxaa loola jeedaa Wasaaradda Gaashaandhigga JFS.
13. **Hay'adda** waxaa loola jeedaa Hay'adda Daryeelka Agoonta Shuhadada, Naafada iyo Qoysaska Xubnaha Ciidanka ee Qafaalka ku Maqan ama La Waayay ee Ciidanka Xoogga Dalka.
14. **Hawlgab** waxaa loola jeedaa Xubnaha, darajo kasta ha lahaadeene. Sharcigu u aqoonsaday hawl-gabnimo, loona gartay in ayan qaban karin hawl ciidameed oo- buuxda.
15. **Agoonta** waxaa loola jeedaa carruurta ka yar da'da 18 sano ee waalidkood (xubin ka tirsan CXD oo naftiisa/nafteeda u huray/hurtay difaaca dalka.
16. **Qoys** waxaa loola jeedaa xaasaska iyo carruurta naafada

ciidanka, xaasaska iyo caruurta shuhaddada iyo xaasaska
iyo caruurta xubnaha ciidanka ee qafaalka ku maqan
ama la waayay.

Qodobka 6^{aad}: Ujeeddooyinka Xeerka

Iyadoo la tixraacayo qodobka 5aad ee shar. Lr. 38 ee 1984 ee ku xusan xeer
nidaamiyehan, Hay'adda waxay xaqiijinaysaa ujeeddooyinka soo socda:

1. Daryeelka Agoonta iyo Qoysaska Xubnaha Ciidanka ee CXD kuwaa oo ku geeriyooday, ku naafoobay, lagu Qafaalay ama Lagu Waayay goob dagaal isagoo gudanaya waajibka qaramaad ee CXD.
2. U ololeynta, tirakoobka, ka warqabka iyo hubinta helista daryeel buuxa oo nololeed (raashin, dhar, hoy, caafimaad, waxbarasho) intii suurtagal ah oo la gaarsiinayo xubnaha agoonta shuhadada, naafada, Hawlgabka iyo qoysaska xubnaha ciidanka ee qafaalka ku maqan ama la waayay ee CXD.
3. Xoojinta adeegyada caafimaadka maskaxda iyo la-talinta ee agoonta shuhadada iyo naafada CXD.
4. In agoonta shuhadada loo fidiyo adeeg waxbarasho, tababarro xirfadeed lana kobciyo hibooyinkooda gaarka ah.
5. Tababaridda iyo awood-siinta naafada ciidanka si ay xirfado shaqo u yeeshaan.
6. Hirgelinta sanduuqyo daryeel oo lagu taageero barnaamijyada agoonta shuhadada, naafada, Hawlgabka iyo qoysaska xubnaha ciidanka ee qafaalka ku maqan ama la waayay ee CXD.
7. Abuuridda ilo dhaqaale oo dakhli ka soo galo Hay'adda sida mashaariic wax-soo-saar iyo ganacsi.
8. Ururinta deeqo ka yimaada samafalayaasha Soomaaliyeed iyo saaxiibbada caalamiga ah.
9. Ururinta iyo ilaalinta diiwaanka Hawlgabka ciidamada XDS, qorshaynta Hawlaha kale ee qaranku uga faa'idaysan karo, ayadoo loo soo gudbinaya xafiiska wasiirka gaashaandhigga si lox biloodle ah.

CUTUBKA LABAAD: HOWLGALINTA HAY'ADA

Qodobka 7^{aad}: Waajibaadka iyo Mas'uuliyadaha Hay'adda

Waajibaadka iyo mas'uuliyadaha Hay'adda waxaa ka mid ah:

1. In ay u ururiso deeqo ka yimaada samafalayaasha Soomaaliyeed iyo saaxiibbada caalamiga ah.
2. In ay tirakoobto taageerana u fidiso Agoonta Shuhadada, Naafada, Hawlgabka iyo Qoysaska Xubnaha Ciidanka ee Qafaalka ku Maqan ama La Waayay ee CXD.
3. In ay ka taageerto naafada ciidanka sidii ay u baran lahaayeen una heli lahaayeen xirfado farsamo oo ay ku shaqaystaan.
4. In ay ka caawiso qoysaska agoonta shuhadada, naafada, xubnaha ciidanka ee qafaalka ku maqan ama la waayay ee CXD helitaanka shaqooyin ay ku

maareeyaan baahiyaha noloshooda.

5. In ay u fidiso ama ka kaalmayso agoonta shuhadada helitaanka deeqo waxbarasho.
6. In ay u fududayso agoonta shuhadada iyo naafada ciidanka helitaanka daryeel caafimaad.
7. In ay si joogta ahna ula socoto xaaladaha nololeed ee agoonta, naafada, Hawlgabka, xubnaha ciidanka ee qafaalka ku maqan ama la waayay ee CXD.
8. Baadigoobka, u ololaynta iyo bixinta xuquuqda Hawlgabka ciidamada XDS
9. Qabanqaabinta munaasabado sanadle ah oo lagu abaalmarinayo geesiyada ku naafoobay iyo ku gaaray da'da Hawlgabka difaaca dalka iyo guddoonsiintooda haddiyado u qalma.
10. Soo saarista talooyin iyo codsiyo ku wajahan dugsiyada waxbarashada iyo jaamacahada dawladda iyo kuwa gaarka loo leeyahay in laga cafiyo qarashaadka waxbarashada geesiyada dhaawacyada culus ay ku soo gaareen hawlgallada difaaca dalka iyo caruuta shuhadada ee jecel in ay waxbartaan.
11. Kobcinta qiyamka daacadnimada iyo waddaniyadda iyadoo la maamuusayo hooyada ugu wanaagsan, aabbaha ugu wanaagsan ee qoysaska shuhadada, iyo caruurta waxbarashada ku fiican.
12. Hay'addu waxay sidoo kale qabanaysaa howlo kala duwan oo isugu jira; dhaqan, isboorti, madadaalo iyo tartanno noocayada kala duwan ee isboortiga ee munaasabka ku ah halyeeyada naafoobey ee ciidanka XDS iyo caruurta shuhadada.
13. Qabanqaabinta bandhigyo farshaxan oo kala duwan ee lagu soo bandhigayo alaabaha ay sameeyaan dadka naafada ah ee ciidamada ka tirsan.

Qodobka 8^{aad}: Dhismaha Golaha Maamulka Sare (Board of Directors) ee Hay'adda

Waxaa la dhisayaa Golaha Maamulka Sare ee Hay'adda kaa oo mas'uulka ka ah kormeerka, korjoogteynta, jihataynta, la-socodka, dejinta siyaasadaha iyo xeerarka lagu maamulayo laguna maareynayo hay'adda iyo ka talo-bixinta hawlaha hay'adda.

Qodobka 9^{aad}: Xubnaha Golaha Maamulka Sare ee Hay'adda

1. Golaha Maamulka Sare ee Hay'adda waxa uu ka koobanyahay shan (5) xubnood oo kala ah:
 - a) Madaxweynaha Jamhuuriyadda Federaalka Soomaaliya ahna Taliyaha Guud ee Ciidamada Qalabka Sida – Guddoomiye Sharafed.
 - b) Wasiirka Gaashaandhigga XFS – Guddoomiye
 - c) Wasiirka Maaliyadda XFS – Xubin
 - d) Wasiirka Waxbarashada, Hiddaha iyo Tacliinta Sare XFS – Xubin
 - e) Taliyaha Ciidanka Xoogga Dalka Soomaaliyeed – Xubin
2. Kulamada uusan joogin Madaxweynaha JFS, Wasiirka Gaashaandhigga ayaa noqonaya shir guddoonka Golaha Maamulka Sare ee Hay'adda.

Qodobka 10^{aad}: Waajibaadka iyo Mas'uuliyadaha Golaha Maamulka Sare ee Hay'adda

Waajibaadka iyo Mas'uuliyadaha Golaha Maamulka Sare ee Hay'adda waxaa ka mid ah:

1. Dejinta iyo ansixinta siyaasadaha, shuruucda, istiraatiijiyadaha iyo qorshayaasha Hay'adda.
2. Hubinta in qorshayaasha hay'addu ay waafaqsan yihiin waaajibaadka, shuruucda iyo siyaasadaha hay'adda leedahay.
3. Xoojinta iyo garabsiinta hawlaha hay'adda ee looga baahdo
4. Kormeer joogto ah iyo qiimeyn ku saabsan waxqabadka hay'adda iyo adeegyada ay bixiso.
5. Dib-u-eegista iyo ansixinta miisaaniyadda sannadlaha ah ee hay'adda.
6. Hubinta in dhaqaalaha hay'adda loo isticmaalo si waafaqsan qorshayaasha iyo ujeedooyinka loo dejiyey.
7. Dejinta nidaamyo lagu xaqiijinayo isla-xisaabtanka iyo hufnaanta hawlaha hay'adda.
8. Abuuridda iyo korjoogtaynta sanduuqa daryeelka agoonta shuhadada, Hawlgabka iyo naafada CXDS.
9. Ansixinta iyo kormeerka maalgashiga hantida sanduuqa.
10. Dhiirigelinta abuuridda ilo dhaqaale oo dakhli ka soo galo Hay'adda sida mashaariic wax-soo-saar iyo ganacsi.
11. Ansixinta siyaasadaha iyo hab-raacyada hagaya maamulka iyo shaqooyinka hay'adda.
12. Tirakoobka hantida agoonta shuhadada CXD.
13. Hubinta in maamulka hay'adda uu ku shaqeeyo hab waafaqsan shuruucda iyo nidaamyada Qaranka.
14. Xallinta khilaafyada maamul ee hay'adda dhexdeeda ama hay'adda iyo dadka ay u adeegayso ah.

Qodobka 11^{aad}: Kulamada Golaha Maamulka Sare ee Hay'adda

1. Golaha Maamulka Hay'addu waxa uu kulmayaa lixdii biloodba hal mar.
2. Haddii arrimo degdeg ah go'aan ka qaadasho u baahan ay soo baxaan kulamo degdeg ah golaha waa la isugu yeeri karaa.
3. Kulamada Golaha Maamulka Sare ee Hay'adda waxaa soo qaban qaabinaya Wasiirka Gaashaandhigga.
4. Kulamada Golaha Maamulka waxaa lagu qaban karaa wasaaradda Gaashaandhigga, xarunta hay'adda ama madaxtooyada.
5. Guddoomiyaha Golaha Maamulka Sare ee Hay'adda ayaa shir Guddoominaya Kulamada Golaha, haddii uu maqan yahay wasiirka waxbarashada ayaa shir guddoominaya.

CUTUBKA SADDEXAAD: MAAMULKA FULINTA HAY'ADDA

Qodobka 12^{aad}: Qaab-dhismeedka Hay'adda

Qaab-dhismeedka maamulka fulinta ee Hay'adda waxaa lagu soo saarayaa Xeer Ra'iisul Wasaare.

Qodobka 13^{aad}: Kaalinta Wasiirka

Wasiirka ayaa Hay'adda ku leh korjoogteyn, iyo metelaadda siyaasadeed si waafaqsan xeerarka Dalka.

Qodobka 14^{aad}: Hawlaha Maamulka Fulinta Hay'adda

1. Diyaarinta iyo u gudbinta Golaha Maamulka Sare ee Hey'adda mashaariicda maalgashiga ay samaynayso;
2. Muulidooda iyo kormeerka si joogto ah mashaariic maalgelineed oo ay hay'addu samaynayso.
3. Samaynta tirakoob joogto ah iyo cusboynaysiinta liisaska shuhadada ayadoo xiriir joogta ah lala yeelanayo taliska ciidamada XDS.
4. Qaadashada go'aanka ku habboon ee ku saabsan noocyada taageerada la siinayo qoysaska shuhadada, iyo sidoo kale go'aaminta qadarka taageerada, habka bixinta, iyo ujeeddooyinka lagu wajahayo.
5. Go'aaminta xubnaha qoyska shahiidka ee mudan in ay gaaro taageerada.
6. Dejinta tilmaamaha maamulka iyo maaliyadeed ee lagama maarmaanka u ah hawlgalka sanduuqa ayadoo loo gudbinayo Wasaaradda Gaashaandhigga.
7. In uu si joogto ah ula socdo, horumariyana wada shaqeynta ka dhaxeysa Hay'adda iyo Wasaaradda Maaliyadda si loo xaqiijiyo bixinta gunnooyinka Hawlgabka ama xaqsiinta loo qoondeeyey.
8. In uu si gaar ah u hubiyo in diiwaanka xubnaha Hawlgabka ah uu sax yahay, dhameystiran yahay, lana cusbooneysiyo sanadkiiba mar.
9. Ilaalinta anshaxa, akhlaaqda agoonta shuhadada, iyo ka ilaalintooda in wax ka baxsan sababta iyo danaha dawladdu ka leedahay daryeelkooda wax ka baxsan looga faa'idaysto ama lagu dhex faafiyo.
10. Dejinta tilmaamaha maamulka iyo maaliyadeed ee lagama maarmaanka u ah hawlgalka sanduuqa hey'adda.
11. Fulinta hawl kasta oo kale oo la xiriirta shaqada iyo ujeeddada hey'adda loo aasaasay.

Qodobka 15^{aad}: Magacaabista Maareeyaha Hay'adda

1. Hay'addu waxay yeelanaysaa Maareeye Guud.
2. Waxaa Maareeyaha Guud soo jeedinaya Wasiirka, waxaana ansixinaya Golaha Wasiirrada, waxaana xeer Madaxweyne ku soo saaraya Madaxweynaha.
3. Maareeyaha waxaa uu xafiiska Hay'adda haynayaa muddo afar (4) sano ah waxaana loo magacaabi karaa xilkaas hal mar oo kale, marka uu dhammaado muddo

xileedkiisa.

4. Inta aysan dhammaan muddada xil-hayntu, Maareeyaha Hay'addu waxaa uu xilka ku waayi karaa:
 - a) Xil-gudasho la'aan.
 - b) Musuq-maasuq.
 - c) Xanuun dhanka maskaxda/dhimirka ah.
 - d) Iscasilaad qoraal oo uu u gudbiyo Wasiirka Gaashaandhigga uuna ka aqbalo.
 - e) Dhimasho.
5. Waxaa Maareeyaha Guud xilka looga qaadi karaa qaabkii markii hore lagu magacaabay.

Qodobka 16^{aad}: Xilka iyo Mas'uuliyadaha Maareeyaha Hay'adda

1. Maareeyaha Hay'adda waa:
 - a. Maamulaha guud ee Hay'adda.
 - b. Mas'uulka ugu sarreeya maamulka fulinta Hay'adda.
 - c. Xiriiriyaha iyo isku xiraha Hay'adda iyo Wasaaradda.
2. Hoggaaminta, maaraynta iyo fulinta hawlaha maamul, qorshe, iyo miisaaniyadeed ee Hay'adda.
3. Hirgelinta iyo dabagalka go'aannada Golaha Maamulka Hay'adda.
4. Hirgelinta siyaasadaha, istiraatiijiyadaha iyo qorshayaasha Hay'adda isaga oo fulinaya tilmaamaha Golaha Maamulka.
5. Diyaarinta miisaaniyadda iyo qorsheyaasha sannadlaha ah ee Hay'adda.
6. Hubinta in maaliyadda, hantida, agabka iyo qalabka Hay'adda loo adeegsado adeegga guud ee Hay'addu u xilsaarantahay oo keliya.
7. Shaqaaleysiinta hawl-wadeenada Hay'adda iyo maamulkooda si waafaqsan Sharciga Shaqaalaha Rayidka Dowladda.
8. Kormeerka, la xisaabtanka iyo la socodka waxqabadka hawl-wadeenada Hay'adda.
9. Horumarinta hufnaanta hawlaha maamul ee Hay'adda oo ay ku jiraan maamulka maaliyadda iyo wax iibsiga.
10. Kobicinta tayada maamulka iyo kor u qaadidda hufnaanta hawlaha Hay'adda.
11. Isku dubbaridka iyo diyaarinta warbixinta sanadlaha ah ee Hay'adda.
12. Maareeyaha Hay'adda waxaa kormeer, korjoogtayn iyo la xisaabtan ku leh Wasiirka Gaashaandhigga.
13. Maareeyaha Hay'adda waxa uu si joogto ah ugu warbixinayaa Wasiirka Gaashaandhigga.
14. Maareeyaha Hay'adda ayaa diyaarinaya warbixinta lixbilood laha ah ee Hay'adda.
15. Maareeyaha Hay'adda waxa uu ka qeyb galayaa shirka sanadlaha ah ee maamulka sare ee Hay'adda.
16. Fulinta hawlaha kale uu u idmado Golaha Maamulka Hay'adda.

Qodobka 17^{aad}: Maareeye Ku-xigeen Guud

1. Hay'addu waxay yeelanaysaa Maareeya Ku-xigeen Guud.
2. Waxaa loo magacaabayaa, xilkana looga qaadayaa habka Maareeyaha Guud.
3. Maareeye Ku-xigeenka Guud waxaa uu qabanayaa xilka Maareeyaha Guud marka uu maqan yahay ama xilka banneeyo. Waxaa kale uu qabanayaa shaqooyinka uu Maareeyaha Guud u xilsaarto.

CUTUBKA AFARAAD: MAAMULKA MAALIYADDA

Qodobka 18^{aad}: Maaliyadda iyo Xisaabaadka

1. Miisaaniyadda Hay'addu waxay ka iman kartaa:
 - a) Qoondada miisaaniyad-sanadeedka Dowladda;
 - b) Qaaraan laga jaro mushaarka xubnaha CXD.
 - c) Deeq ay bixiyaan ganacsatada Soomaaliyeed.
 - d) Deeq ay bixiyaan samafalayaasha Soomaaliyeed.
 - e) Waqafyo dhaqaale abuur leh.
 - f) Sakada laga helo shirkadaha iyo bulshada Soomaaliyeed.
2. Dhammaan lacagaha soo gala Hay'adda waxaa lagu shubayaa khasnadda mideysan ee Dowladda, waxaana lagu maamulayaa si waafaqsan Sharciga Maamulka Maaliyadda Guud (Sharci Lr. 17 ee 2019).
3. Hay'addu waxay si madax-bannaan u maamuli kartaa miisaaniyaddeeda oo ay ku fulin karto waajibaadkeeda si waafaqsan Xeerka Maamulka Maaliyadda Guud.
4. Miisaaniyadda Hay'adda waxaa lagu saleynayaa qorshe-howleedka sannadle ah, waxaana qorshahaasi diyaarinaya Maareeyaha Hay'adda, waxaana ansixinaya Golaha Maamulka Hay'adda.
5. Sidoo kale, Haye'addani, mashaariicdieeda, hawlaheeda iyo adeegeeduba waxa ay ka faa'iidaystaan dhammaan ka-dhaafisyada iyo fududeymaha sharciyeed ee ay leeyihiin Ciidanka Qalabka Sida ee Soomaaliya.
6. Maareeyaha Hay'adda ayaa mas'uul ka ah diyaarinta xisaab xirka sanadlaha ah ee Hay'adda.

Qodobka 19aad: Shaqaalaha iyo Howlwadeennada Hay'adda

1. Hay'addu waxay lahaanaysaa shaqaale si waafaqsan xeerara Dalka
2. Hannaanka shaqaaleysiinta ee Hay'addu waxaa uu noqonayaa mid daahfuran, ku saleysan istaahil-xulasho (merit based), iyadoo la raacayo xeerarka shaqaalaha ee Dalka.

CUTUBKA SHANAAD: QODOBBO GUNAANAD AH

Qodobka 20aad: Wax-ka-beddelka iyo Baabi'inta

Wax-ka-beddelidda ama baabi'inta Xeer nidaamiyahan waxaa loo marayaa habraacii loo maray markii la sameenayay.

Qodobka 21^{aad} Soo saarista xeer-hoosaadyo

Wasaaradda Gaashaandhigga ayaa diyaarinaysa, soona saaraysa xeer- hoosaadyo faahfaahin iyo fasiraad looga bixinayo xeer-nidaamiyahan.

Qodobka 22^{aad}: Dhaqangal

Xeer-nidaamiyehani waxaa uu dhaqangalayaa marka Golaha Wasiirradu ansixiyo, Ra'iisul Wasaaraa Xukuumadda Jamhuuriyadda Federaalka Soomaaliya-na saxiixo, waxaana lagu soo saarayaa Faafinta Rasmiga ah ee Dawladda.